

Middeweeek!



Dat Hart an de rechte Stee

van Manfred Briese

„Wat 'n nüdelk Wicht!
Na ja, bi de Moder!
Keen Wunner!“

Ik stunn inmidden van en Slang an de Kass. De jung Froo vör mi, nett bi 't Uppacken up dat Band, dreihde sük na mi hen un smüüsterde. En rosa Sleier glee sacht over hör Gesicht. Hör Lüttje seet vörn up de Kinnerstanz van de Inkoopswagen. En Krullerkopp.

Wat gifft dat doch schier Kinnerkes un schier jung Moders!

Mooi Ollen – mooi Kinner? Mutt neet. Dat heet ja ok, up Messbeeten wussen de smakelkste Eerdjebejen.

Mien Fründ Heiko is 'n raar Slaukopp. Een van de Lüü, de Kattschiet in Düüstern ruken. He seggt, all harr sien Regel un Recht. „De een kummt di so nüver vör, as weer he ut de Illustreerten utsneden, de anner hett daarför arvt, wat ok neet minn to achten is: Verstand.“

„Stimmt neet!“, muckt Sigi up. „Ik kann di Bispillen genoeg uptellen, de dat Tegendeel bewiesen. Nüdelk Wichter, de ok noch Verstand hebben, 'n Bült mehr as du!“

„Na ja - daar segg ik nix to!...!“, smüüstert Anni, Sigi

sien Ollske. „Dat gifft doch Mannlüü, de hebben nix van beid. De sünd nett so töffelig as man wat, vör de dreihet sük sogaar de Spiegel van sülvst bi d' Sied.“

„Dat magg woll!“, gifft Sigi to. „Man dat sünd mennigmaal de besten. Neet so upblasen un dicksnuterg. Wenn du bi de ankloppen deist, nögen se di in 't Huus, freien sük, dat du komen büst. Se umsörger di, as weerst du de wichtigste Minsk up de Welt. Sett di man driest hen! Dür ik di 'n Koppke Tee anbeden? Of villicht 'n lüttje Sööpke? Sükse Lüü sünd mi egentlik de leevsten.“

„Daar kannst up an, Sigil“, meent Heiko mit 'n Upsnuckern in de Stimm. „Dat sünd Minsken, de hebben dat Hart noch an de Stee, waar 't henhöört! Recht hest du, mien leve Sigil!“ He wisket sük de Tranen, de d'r heel neet sünd, ut de Ogen, de Düvel, un knippoogt Anni to.

Dat is to vööl! He hett Glück, dat de leve Sigi blot de EZ to faten kriggt un na hum smitt. Man Heiko springt up, will utwieken un - 'peng' - stött he de Kopp an de open Döör van de Kökenschapp.